



帝京景物畧

卷之八

畿輔名蹟

狄梁公祠

劉司戶祠

九龍池

峒峒崖

銀山

駐蹕山

以上昌平州

上方山

雲水洞

石經山

紅螺嶮

賈島墓

以上房山縣

樓桑村

督亢陂

酈亭

以上涿州

張華宅

彭小仙墓

以上固安縣

燃燈佛塔

李卓吾墓

以上通州

盤山

千佛寺

以上薊州

湯泉

以上遵化縣

延祥觀栢

以上平谷縣

沙巖寺塔

以上豐潤縣

種玉田

以上玉田縣

紅螺山

以上懷柔縣

帝京景物畧

卷之八

遂安方逢年

定

麻城劉

侗

脩

宛平于奕正

狄梁公祠

過沙河二十里，至新井庵，松有林，聲能鼓，能濤，影能陰，畝西數里，有臺，曰景梁臺，土人立以思狄梁公也。柳林如新井庵松，照行人衣，白者皆碧，柳株株皆蟬，噪聲爭夕，無復斷續，行其下，語不得聞，又

五里、始梁公祠、祠自唐、草間不全碑碣、猶唐也、元大德間、重建之、我正統間、重脩之、其碑云、梁公爲昌平縣令、有媼、子死於虎、媼訴、公爲文檄神、翌日、虎伏階下、公肆告於衆、殺之、土人思公德、立祠也、祠前一古木、仆地、如伏者、虎相傳、木亦唐時也、木傍數株、栢也、盤結、不可以緒、南數武、道上立二石幢、鐫梵語、字法類李北海、唐貞觀中幢也、過西廢寺、石數段、亦幢、其二幢、唐玄奘手書、

上元倪岳謁狄公祠○城西親拜狄公祠、袍笏森然、仰令儀、此地孤雲心尚在、中天落日手曾支、平生事業存唐史、一代文章託范碑、聞道邑民能報德、春風香火重追思、

茶陵李東陽昌平道中望狄公祠○碧山西望遡流颺、欲弔唐虜誦楚辭、寄遠東芻誰與致、衝寒瘦馬不勝騎、心懸晉嶺瞻雲地、功在虞淵取日時、預擬明年寒食候、莓苔壁上爲留詩、

吳縣王鏊狄梁公祠○孤鴻海上直磬磬、雙翠誰
補殿上袍、鍊石有方天可補、壓弧無驗鬼空號。
參苓入籠還爲用、稂莠當堦不受爇、南望河陽
如在眼、青山內外白雲高。

休寧程敏政謁狄梁公祠○香火煌煌照翠微、古
祠猶在舊城非、殘碑蝕土高三尺、老樹凌霜大
數圍、隻手臣扶紅日上、寸心子望白雲飛、偶來
未及椒漿奠、回首青山帶落暉、

再過狄梁公祠○崇祠香火傍高林、想像生容
一正衿、猛虎尚馴良吏手、牝鷄能拂老臣心、孤
雲渺渺回天末、短日悠悠及歲陰、古道荒榛知
不遠、瓣香他日再來尋、○青鵝無計牝辰危、月
望雲深日向垂、元嗣未應堪再辱、孤臣寧復避
多嗤、台衡得相方能國、神器非公定付誰、歐史
范碑明皦日、居人徒識令君祠、

襄垣劉龍謁狄梁公祠○梁公祠宇舊城西、禾黍

秋原信馬蹄、雨剝斷碑苔半合、雲埋老樹鳥空啼、
天傾杞國心如噎、日墜虞淵手自携、二十年來一登眺、
感時懷古此畱題、○遺容儼雅廟深幽、血食橋山路畔州、
墻外野雲依樹度、門西溪水抱村流、前朝事業無抔土、
異代衣冠有勝遊、欲下石欄還徙倚、青山斜日共悠悠、

長洲陳仁錫狄梁公祠○伏鎮回唐祚、牝鷄不敢鳴、
推心隨國史、潛涕定台衡、蘇碣霜還粟、虞淵日自明、
千秋餘正氣、豈獨祀幽甿、

劉司戶祠

呂平劉蕡唐文宗時憤宦官恃功專權應制對策
 極言禍福第策官左散騎長侍馮宿等讀蕡對嗟
 服而畏忌不敢取時參軍李邵登第乃上書自劾
 乞回所授以旌蕡直後七年甘露難作令狐楚牛
 僧孺皆表蕡幕府師禮禮之而宦官深嫉蕡誣以
 罪貶柳州司戶參軍卒後昭宗感羅衮言贈諫議
 大夫謚文節封昌平侯元泰定間建祠州西南五

里、曰諫議書院、至正間、又建祠舊州東、叅政許有
 壬撰碑、我明弘治間、談本彝、移建學宮內、今圯
 焉、世多謂蕢策不利于時哉、身前為宰相師、以有
 畏不取者、身後感動人主、以有嫉之誣之貶之者
 矢激則遠、水洄則深也、一下第舉子、贈謚侯封、祠
 祀百世、令當年收策登上第、亦復一李邵耳、且邵
 故因蕢傳久遠至今、為自劾一書、不為一第矣、即
 馮宿令狐楚、牛僧孺、當年禍福升沉、亦何至響景
 蓋荏直殊意、而蕢名以彰、志稱蕢宅蕢墓、在昌平
 今其址、俱不可尋、崇禎五年、劉京兆榮嗣、謀于董
 宗伯其昌、為撰碑、手書之、以風策士、宗伯曰、蕢已
 追贈諫議矣、猶司戶稱存憤也、

茶陵李東陽謁劉諫議祠○布衣人拂逆鱗龍、一
 代危言此地鍾香火制存身後廟策時書在閣
 塵封、皤皤戴髮餘民改、折折穿山舊路重、欲向
 五陵還弔古、永安城外落霜鐘、

太平謝鐸宿劉諫議祠○漏轉山城嘿坐遲、一燈
明滅幾停吹、憂心儼覺神如對、衰夢空憐夜作
期、五度客來應見我、百年人在定應誰、壁間敢
恨題名晚、淺薄終慚諫議祠、

歙縣程敏政劉諫議祠○三年重拜諫臣祠、手掬
寒泉酌一卮、氣節可興天下士、蒸嘗無媿社中
師、對廷舍子嗟唐策、憂國憑誰續楚辭、今日萬
幾歸聖斷、有臣應恨不同時、

慈谿姚涑謁劉蕢祠○古樹扶疎芳艸繁、獨遺忠
額表幽軒、春秋正始丹心壯、城社興妖白日昏、
四壁詩篇空往事、百年俎豆尚英魂、悠悠此恨
無今古、山月淒涼照北村、

吳縣王鏊劉諫議祠○荒灣野木古城隅、何處昌
平是舊廬、氣帶幽并多感慨、策如鼃董亦迂疎、
同時下第誰云屈、此外求言總是虛、不盡懷賢
千古意、執鞭無路欲何如、

吳江周用劉諫議祠○此日何人問濁流、大廷方
屬艸茅憂、衣冠落落人心死、河雒行行王氣收
千古直臣唐諫議、一篇正學魯春秋、餘生今日
顏猶汗、香火荒祠起暮愁、

襄垣劉龍劉諫議祠○從遊不媿逢千後、伯仲何
慚賈董間、一介布衣天下計、滿梁華月古人顏、
臨軒猶策言、誰盡想像尋思骨、自孱寂寞學宮
西畔路、停停今是幾追攀、

武進唐順之題劉蕡祠○歲莫山城搖落時、客來
下馬拜荒祠、獨傷往事生流涕、欲問遺墟不可
知、璞玉無因輕易棄、龍鱗有逆信難披、登科今
日還吾輩、顏厚於君何所辭、

內江趙貞吉劉蕡祠○一策乾坤正氣收、當時朋
輩至今羞、沙連塞艸寒三畝、葉和村煙覆一丘、
濁水無情流白馬、荒山何處望青牛、罷歸遠竄
非公恨、所恨身前鼠未投、

香山黃佐劉諫議祠○諫議祠堂在、栖栖托泮林、
雨垣春蘇合、風柳暮蟬吟、溢浦天何遠、沙河水
自深、投荒終棄置、入幕始浮沉、宮府分南北、興
亡共古今、吐辭扶白日、回首破層陰、牢落千年
夢、淒清此夜心、停鑣休遠躅、鴻影在高岑、

莆田鄭善夫劉諫議祠○今古悲歌地、劉生有墓
祠、祇餘經世志、况值許言時、去國英雄盡、還山
事業遲、黃金舊臺北、以首動遐思、

長洲陳仁錫劉諫議祠○布衣修諫艸、媿已在三
公、何直登科日、能生策士風、鱗嬰劉向逆、疏抗
比干忠、今我瞻山斗、昌平一故宮、

孝感胡江謁劉諫議祠○等閒一策失雄雌、諫議
名高身後祠、士賤豈經時、宰慮主憂惟望侍、臣
知北曹任事如公說、西角邊愁獨我思、灑淚橋
山明日路、無言媿聽水流澌、

九龍池

泉得山英石得山雄。不知其地中土也。視其石濡而密緻。泐之而柔。五土四備已。不知其氣行地中也。酌其泉而甘。權他泉而重焉。熟之速。涼之遲焉。四氣春夏備已。九龍水出翠屏山之陽。泉出爲池。池方十丈。池出爲溪。溪五里。謁泉者沿溪入石瀨。左右溪以淺深。蒲葦以淺深。溪行者以盤折藏露。望前菁林中。晃晃黃甍。出繚緝上。九龍池也。望林

端百尺、雲頭層層、瞰池危立、大聲出其間者、池上
壁、壁間泉也、泉脉乎石者怒、而其脉九鑿九龍吐
之、非龍其勢亦吐、不繚繚而帛、則珠珠而簾耳、吐
泉破池、池面剝、水駭散、霧沫所及、檜竹桃李、夾池
叢叢、水之定處、見峯影蒼黑、當池之南、稍東而池
影又動、水趨關、逐渠、繞繞、西入山田、去作農務矣。

世宗謁 陵過池、命構一亭一臺于池之北、

亭曰粹澤也、今 陵卒夥、願道 列聖駐蹕事、

績溪胡松從觀九龍池水殿○水殿新營 御幄

西、上皇曾此數登躋、千秋古樹凌雲上、九道

甘泉瀑布齊、柳帶年光含白霧、花將春色上黃

鸞、從遊擬獻長楊賦、臣朔無能媿不稽、○當年

此日饒風雨、此日清明又不晴、花發靈巖含

御靄、鶯啼繡樹轉春情、無邊朔氣通玄微、萬里

雲山擁漢京、傳語同游莫虛負、共將歌頌答昇

平、

上元許穀九龍池○九位時乘石作龍穿池引水
水含空風前活活驪珠吐地底原原碧漢通緹
幕盡懸金榜外翠華齊降碧巖中卽看藻恩
魚躍還與微臣望幸同

涇縣王廷幹觀九龍池○龍門開碧苑池色映丹
丘芳樹緣堦轉清泉入戶流名丘花氣靄虛谷
鳥聲幽草閣曾清蹕雲峰憶彩旒水憐空
鑑照山望斷烟浮卽此消千慮何須覽十洲

內江趙貞吉九龍池○九龍池傍帝陵隈羣壑
泉澄寶鏡開疑隱神駒精爽動似流烏鵲羽毛
來山藏萬姓攀留鼎燭照千年秘護臺爲有香
爨繞松栢故令蟠屈長鱗苔

歙縣汪道昆九龍池○水殿三秋爽山泉九派清
尋源迷徑入倚檻忽雲生星沫縣河鼓風波動
石鯨敢論臨太液或恐象昆明

江寧顧起元九龍池○碧簷紅樹上扶疎漭沆靈

池混碧虛，天鏡月流千嶂後。神珠日抱。九陵
初。青雲似覆臨河馬。綠藻疑潛在。鎬魚共道此
中涵。聖澤年年玄社薦龜書。

南昌樊良樞九龍池○白日銀河動地來。石欄紅
砌水滌洞。春生霧沼層冰泮。雷奮天門九鑰開。
魴尾故應涵睿澤。鰲冠祇許戴蓬萊。羣公在藻
承恩寵。魚麗欣陪數舉杯。

新野馬之駿九龍池○曲沼堪流照。層軒亦駕虛。
葉聲雨濺後。潭影月虧初。藤度新巢鶻。萍開不
射魚。白頭憐衛士。指點說鑿輿。

孟津王鐸九龍池○山寂饒靈氣。禴成開水塘。荒
原流荇藻。禁水蔭虹梁。客淚園林墮。龍涎雷雨
藏。我朝應過曆。宗海見滄桑。

興國曹景參游九龍池○小澗琮琤活水侵。問源
不遠可幽尋。潛龍默漱。諸陵液。結駟平披一
鏡心。老樹棲風鳴謾謾。穉魚分藻立森森。短垣

曾是經行幸，幾段飛光破晝陰。

岫岫崖

昭陵之北曰岫岫崖，旋旋蟠蟠，望若梯磴，石醜怪，若鬼面，泉爲繞，陵而幽幽，樹爲禁，陵而鬱鬱。下崖之菴曰瑞峰，一曰麻尼，崖高危立，菴逼其踵。南山前逼菴而又高危，冬前後兩月，蔽不見日，惟短至日，景一線透之。崖三峰而三菴，兩峰翼中峰首，自盤道菴以之東峰菴，壁與石與樹也。西若，有奇焉。自渡津橋以之西峰菴，壁與石與樹也。東若。

有僻焉。自東西峰以之中峰菴。壁與石與樹也。東
西若有高焉。天啓中陵監飾五菴新矣。三峰失其
朴。

金壇王樵聽遊岫岫崖歌戲呈近溪羅子○康陵
齋坐客羅子獨來晚。爲言岫岫崖池西一峰遠。
初尋樵徑密。仰不見白日。五月陰風寒。背巖雪
猶冽。看看路欲窮。忽與前山通。世外得人境。古
寺蒼崖中。捨杖獨息石龕坐。老僧提茶過青松。
舉頭見塞外。夏艸如秋空。客嘯震崖崖。亦答日
夜不斷高天風。抗手別僧一客還。上崖不艱下
維艱。琮琤鳴者九龍灣。馬頭明月松陵關。

歙縣汪道昆 山陵事畢登岫岫崖○望望巖棲

勝行行澗道迴。攀躋從地險。豁達忽天開。朔氣
盧龍近。秋陰渤海來。號弓無處所。倚杖有餘哀。
○鳥道逶迤盡。雲林高下居。有溪皆絕壁。無地
不精廬。偶欲留僧榻。眠因枕佛書。明朝車馬客。

歸路夜何如。○伊誰開浩劫、未敢問山靈、法眼
空三界、神功自五丁、徑行林竹紫、高坐嶽蓮青。
一片頭陀石、重來好勒銘、

順天王嘉謨、岫岫崖○莫謂靈丘遠、近於陵寢
傍、嵯峨時可度、窈窕勢翻長、苔滑和風滿、花明
永日涼、叢篁涵地脈、積雪湧山光、蒲有仙人採
盆疑玉女漿、琳琅耀霧府、璀璨照疆場、習坎寧
求止、探奇興不忘、登登峰絕頂、仰仰意蒼茫、

蒙陰公龔岫岫崖○橋山西北寺、一谷隱千峰、曲
折崖屏掩、高低閣棧重、傳觴獮飲澗、倚蓋鶴巢
松、小憩聽泉久、東巖已暮鐘、

長洲楊補岫岫崖○漸欲入深陰、岫岫厓勢侵、線
通人一徑、鬼作面千岑、白日傳山柝、青天早杏
林、游心正森肅、自未此幽尋、

仁和阮泰元登岫岫崖○一徑沿山曲、馮高俯大
荒、上方瞻王氣、北極壯金湯、出岫雲低度、驚人

鳥下翔、凌虛天外去、身世與相忘。○水涸溪為、
徑、崖危石作梁、雲消嵐樹出、風過客衣涼、松磴
行踪少、艸菴度歲長、瞻天在咫尺、萬載 帝陵
鄉、

秋莫登岫、岫崖○諸陵佳氣鬱蒼蒼、上接諸天
互渺茫、澗道高盤華夏壘、霜林羣簇 帝王鄉、
尊峰鼎出浮雲立、至日絲垂古壑光、共說壯遊
今獨勝、不知人世已斜陽、

銀山

天壽山東北六十里、曰銀山、或曰望也、非金方鎔、
于冶、非月下之潮、方至、非鑛甲練刃、西來萬騎而
日方東、山之光也、曰銀山矣、或曰礦焉、銀山近
皇陵、故禁樵採、松不勝其柯、而偃栢拂地而已、枝
椽子落而無人收、榆柳條繁而禁老秋、壁生樹頂、
泉流葉間、山最高曰中峰、懸索升之、三四里、上石
欄、供石佛、唐鄧隱峰禪師、修于此山、道成此山、故

多隱峰跡、峰下石巖、隱峰晏坐處、巖上石如臺也。
隱峰說法臺、嶺邊一松、曲如梳枷也、隱峰挂衣樹、
峰有妹、與俱出家、夕定巖下、冥府攝峰、鬼詣峰前、
覓不得見而去、末山尼開堂說法、峰挾刃夜試所、
守、尼憚失志、取其袒服、集衆曉之、其徒立散、峰叅
馬祖得悟、因遊五臺、路出淮西、屬官軍討吳元濟、
鋒方交、峰擲錫空中、飛身而過、兩軍齊見而譁、後
入金剛窟、將示寂、問衆曰、諸方遷化、坐去卧去、還

有立化也無、曰有、還有倒立也無、曰無、師乃倒立
而化、亭亭然、衣亦順體、斬斬然、昇就茶毘、不可動、
屹屹然、其妹咄曰、兄生不循法律、死更惑人、推之
而仆、中峰下有寺、金天會三年建、曰大延聖寺、殿
三重、墀皆僧瘞骨塔、自佛覺禪師下、凡七、正統十
二年、太監吳亮重修、請賜名曰法華、二碑、皆吳亮
自撰并書、其一碑曰感恩、感英宗丁卯三月三
日、謁陵畢、幸寺降香、賜僧白金綵幣碑也、按亮

逮事建文、比建文自滇入京、無識者。英宗遣亮往、建文遙見、卽曰吳亮也。亮漫曰非、建文曰亮、爾昔進食、擲鶩賜爾、爾兩手各有執、乃就地餌以食。爾忘之矣。亮泣、伏地不能起、復命退而縊焉。又金大定六年碑、刻隱峰銀山十咏、又弘治十年碑、翰林學士汪諧、淨業堂記、今斷、寺西上半里、松棚菴、門內外各一松、松正似、俱輪蓋、內陰滿院、外陰滿崖、北上一里、鐵壁寺、塔曰延聖塔、弘治四年建、塔前、弘治八年釋行倫詩碑、記稱法華寺、領七十二菴、今菴自松棚下、二十五爾、出山北四十里、井兒峪、菴峪中、一山蹙其額、終歲不承日光、又一里、玉峰山、山盡石、石盡白、樹盡頻婆果、果林中、大萬聖寺、土人呼張開寺、寺久頽落、像設皆石、今露而坐立也、殿前一大松、僧云備五種葉、二種耳、側掌栢也、針松也、入山者、取道二、從白泛嶺入者、壁奇、栢栢奇、而路險難、從三思嶺、牛蹄嶺入者、路則平、木

石亦平矣、

慶陽李夢陽銀山寺○銀山湯嶺北、天外削三峰、
下見林中寺、來聞午後鐘、僧徒住石屋、雷○雨○拔○
門○松○西望岡陵接、雲成五色龍、

武昌吳國倫銀山寺○黃姑山頭白霧升、鐵壁古
寺羅荒藤、居人已測金銀氣、法界猶懸日月燈、
聊寄孤松仍結社、未須三竺更逢僧、西風七十
二鐘磬、立馬歸途思不勝、

武進唐順之銀山說法臺○秋山面面翠屏迴、孤
石支撐說法臺、想見高僧開口處、峰峰曾與點
頭來、

游鍊壁○中峰特竦如削鐵、古松根透石紋裂、
扶我中峰頂上看、指爾八荒筇九節、

歙縣汪道昆銀山法華寺○五陵東望白雲端、水
壑松門歷化壇、別有人天經浩劫、高縣佛日照
長安、林中雙樹龍宮隱、天外三峰鳥道盤、開士

倘分香積飯，宰官擬挂惠文冠。

昌平崔學履銀山○絕巘層巖相鬪奇，古藤宿樹
轉透迤，遙空共指銀爲障，向上齊看鍊作帷，吟
望、今、多、游、客、句、藏、修、昔、止、隱、峰、居、從、來、勝、跡、緣
人事况近 皇陵紫氣垂、

延安楊兆銀山寺○翠柏丹楓望不通，不知七十
二菴叢，山陵木石神人護，畿甸耕耘民俗同。
水淨月盃眠桂影，夜涼雲衲助秋風，縣知舍利

藏幽谷，早晚飛光上切空，○黃蝶西風白雁回，
遙天秋色入崔嵬，年深俯仰懸衣樹，事杳傳聞
說法臺，寺有山靈司藪牧，林無日影射氛埃，夕
陽欲下招提暝，涼月紛紛照酒杯。

濰州劉應節登銀山鐵壁寺○石磴藤蘿漫不窮，
但隨鐘磬得禪宮，芙蓉乍削三峰出，鸞鷲高盤
一徑通，立影孤巒低落日，看雲萬里御秋風，蒼
蒼鬱鬱無蕭瑟，塞上今茲草木空，○白馬金牛

去不回、銀山鑿壁自崔嵬、曇雲歷歷中峰頂、香
雨祁祁說法臺、身半百年成夢界、虛無盡處見
如來、關河日暮聞清籟、獨坐松根意轉哀、

太倉王衡走銀山道○寥寂荒山徑、人隨黃葉蹤、
林虛峰影亂、谷老雪痕封、落日閒歸牧、投煙及
暮鐘、到來頻立馬、鳥道幾重重、

宿銀山寺○野宿俄逢酒、匡牀影對吾、僧寮與
譚虎、佛供聞啼鼉、月壑懸相照、風鈴莽自呼、夜
清鐘磬發、驚我尚征途、

銀山歸道○澹日荒平野、差池我馬黃、暮山看
便好、空翠遠相將、寒入鳥栖亂、煙含獵火涼、心
悲松栢地、鎮夜月蒼蒼、

蒙陰公光國遊銀山登中峰頂○中峰直下視蒼
蒼、高建天蓉日月傍、松作虬形旋佛國、巖如虎
踞擁陵岡、千林不雜頻婆果、七塔誰含舍利光
晏坐解衣隨便好、名成木石已荒唐、

靈寶許個游銀山○疊嶂迴流轉不前翠林深處
梵宮懸雨過黛色生濃澹風急松聲無斷連法
石坐來思半偈中峰上到接諸天山僧未慣欽
官長歌負壺漿餉野田

濟南于廷真銀山○皇家封樹鬱蒼蒼東北相傳

古道場青艸深迷陵下路天花散落佛前香

閒泉繞澗東西聽熟馬穿林蹊徑詳但見如鎔
銀色聚不知山靄塔毫光

順天毛銳說法臺○錫自幾年挂石臺選最深衆
山同樹色亂澗若泉音日月光無遠人天護到
今道成名勝蹟峰隱昔何心

宛平于奕正銀山說法臺○隱峰晏坐處艸長石
臺平澗響水爭壑林花雨正晴佛看僧入塔客
問鳥無名歸去遠將久四聞鐘磬聲

張開寺○古刹老僧荒僻地自無外客此深窮
壁塵題字四朝上簷曝宜人三伏中搭屋不除

丫角石縛門正借驪腰松飛丹矗碧西山寺瑣
瑣何爲鑿化工

駐蹕山

山在昌平州西南二十五里高十餘丈石嶮沓危
立相與趨走狀不可駐西北袤二十里自金章宗
游此鐫駐蹕字人呼駐蹕山遂逸其初名上有臺
章宗自題棲雲嘯臺四字下觀野燎而獵召其酋
長大人擊毬俄而自擊自賞嘆曰美乎哉無人見
之須臾石羣起若觀章宗益自喜灌以酪故石頂
至今白存山下有洞名寒崖與邃中乃多異艸奇

木。草木資風日雨露也。今洞生外霜時亦自落洞中。也。西曰虎峪。幢幢水出焉。瀑飛下三四里。至鵝
鴿巖下伏矣。人或謂昌平舊縣虎眼泉。是幢幢水
復出處。其有據歟。其無據歟。凡從嘯臺過虎峪者。
蓋惆悵不決而返。

上方山

地。生。初。巖。壑。具。已。其。爲。懷。襄。蕩。蕩。湯。湯。其。爲。天。龍
神物。傾塌排觸。孰測所然歟。人游游處處。言言語
語。山受名伊始焉。有初古名者。有傍幽人鍊士名。
以名者。有都邑郊焉。近晚名者。有人古莫至。山今
未名者。名不厭熟。山不厭生。至不若所不至者深
矣。大房諸山。宿名也。而上方山。晚得名。一二百年。
續續有過從者。循孤山口而西。峰橫澗束。澗上側

徑如古牆邊趾人如行術中村落林烟水田麥畦
 時時有大畧似外人閒叟媪壯農媿婦樵牧豎子
 見人無不喜畏遠窺之十二三里至下接待菴兩
 壁巉截中隱一罅可狺蛇徑耳不自意容步過身
 也穿不斷罅光前前萬萬不成準繩三步則旋四
 五步則折仰天青蒼日一丸白跳而東西至此坐
 愁歎或悔焉望一平可息歇處喜矣曰歡喜臺也
 奇峯環臺臺環視之有敵樓似者睥睨欄楯具有

蓮華似者青蓮而黃其趺竟似矣非依約擬似也
 歡然行二里過兜率門一里得石級以升級三百
 升九索毘盧頂也別一國土矣暘然猶故天日遠
 風平疇泉流維緩計里方五十菴寺一百二十入
 巖嵌石出壑鬪空者最藥師殿華嚴龕珠子橋行
 行半里則上方寺矣寺不知當山外何方記入時
 上又上是上方也寺左起一峰百數十丈石質潤
 滑黃間五采色上有冠若柱若久當墮矣未墮也

峰下泉曰一斗泉。泉于峰爲下，于上方寺高踞百尺也。清則流水，渟則止水，澹焉凝焉，則雪雨露水相傳注，泉熟腥，便伏，懺謝，復蠕蠕矣。峰有名者，大摘星峰、小摘星峰、望海峰，寺數碑皆明，無隋唐亦無遼金。夫幽僻故碑應無毀者，其山自古，其寺自今茲哉。

侯官曹學佺上方山路○路訪居人遍，驚言未到時，老翁爲向導，瘦馬仔驅馳，野樹懸水溜，茅茨壓石皮，幾村繇姓著，訛語至今垂。○瓦井尋何處，沙溝苦欲崩，斷碑猶有寺，乞食卽無僧。山勢開仍闔，天光降遞升，平生躋絕險，今此鳥俱騰。○客到孤山口，山家勸客休，果筐年事設，茶盃冷烟浮，穉子遠來看，此翁如有求，所悲城市者，相識也悠悠。○磊磊踏危石，泠泠見碧潭，不知身薊北，宛已路江南，淨色沾眉喜，清泉戒齒貪，窮源逢側壁，智者結爲龕。

上方寺○懸崖車馬絕。杖步僅能躋。寺向雲中起。僧從天上棲。艸菴尋徑遠。冰窟聽泉迷。爲擬前峰是前峰。到又低。

斗泉寺○冬嶺未蕭蕭。青依檜栢條。斗區泉不涸。陰壁雪難銷。壇角當山瀑。洞門聞海潮。熟腥維有戒。自牖托僧寮。

晉州黃榜上方絕頂○峰巒天外境。入處隴疇低。隱約千菴磬。聞傳四境雞。上方僧俗朴。下望遠空迷。特地徘徊久。流泉過別溪。

長洲孫嗣烈上方山○上方人徑絕。絕壁罅中躋。大小星能摘。東西日欲迷。溟泉曾受戒。危石只空栖。百二菴疎濶。知他世界低。

慈谿馮有經上方寺○層巒杳嶂擁林丘。老檜長楸夾道稠。苔護斷文留古勒。雲移壘石架危樓。連峰恒碣天之外。極路幽并海到頭。無限碧山迷夕望。分身安得盡情遊。

嘉興朱茂時登上方絕頂○絕頂今觀迥不齊直
疑雲與較高低已非人境猶千寺還上星辰更
幾梯自始樵蘇時近代虛疑仙與古初迷洞中
孔水桃花片異種知生何處谿

雲水洞

登大小摘星嶺西望胡良拒馬大小河如練如帶
如游絲在拄杖下顛則落河中耳而隔山不知其
幾十里望且行緣嶺四五降升達雲水洞口買炬
種火脫帽旋結履襪薄飲且飯倩土人導秉炬帚
杖隊而進洞洞門高丈入數十丈乃暗乃炬乃卑
乃偃行又數十丈鹿豕行手足掌地肩背摩石又
驚行肘膝着地背腹着石又蜥蜴行背膺着石鼻

領着泥。以爪勾而趾蹲之。乃卑漸高矣。則苦煤。從前入者炬灰也。觸焰飛而暈。觸手黥不脫。導者帚除之。後者袖左右麾以入。漸見垂鍾乳。入漸高。雖高。然曲盤且仄。罅也。則前炬張如螯。後屈曲。又蟹行。蟻行焉。入又漸張。垂乳甚衆。冰質雪膚。目不接。土石色。心忪忪。痒痒。謂過一天地。入一天地矣。左壁聞響。如人間水聲。炬之。水也。聲落潭底。不知其歸。又入。有黃龍白龍盤水畔。爪怒張。導者曰。乳石

也。焯炬其上。杖之而石聲。乃前揚炬。望鍾樓鼓樓。欄棟簷脊。然各取石。左右擊。各得鍾聲。鼓聲。磬聲。木魚聲。聲審已。導者曰。塔。共擲石而指塔。塔層層。大三圍。其半折。導者曰。雪山也。果一山紛如。光霏霏者。芒如。磴益側不屬。石益滑。乃又臂引猿行。又入而左。有天光透入。定想之。洞口外晝光也。光所及。壁上有字。可行可數。若梯可致也。尚其可辨識。左側高廣。有光亂亂。乃衆泉瀦分受。炬光。泉深莫

測而穴復窪小、從前入者亦無更進此。凜然議且出、凡洞行得一爽、叢而息得一遺、炬履而壯得一形、似外人造者物而嘉歎得一光、知猶天也、而心安。然凡入洞三易炬、出殺炬三一、凡入洞伏仆仄援、七易其行、出殺行十一、出洞矣、趨接待菴、中道一石、小兒足跡、僧曰善財也、按志大房山下孔水洞、時見白龍出、輒化爲魚、嘗又聞樂作、唐胡詹記有人構火浮舟、行五六日莫究、但仙鼠旋飛、頰魚來近火光也、開元間旱、每遣使投玉壁、金泰和中忽桃花流出、瓣如當五錢、今山下別無孔水洞、其卽雲水洞歟、而入不可以舟、而洞中潭亦不得所從出也。

侯官曹學佺雲水洞○幽探來此日、開鑿識何年、秘象殊方世、層層扁別一天、莊嚴成古佛、縹緲儼飛仙、潭畔雙龍狀、爲珠亦自圓、○容身無剝處、空濶亦難窮、樓入穿花麗、臺臨說法崇、千重雲

氣繞幾道水聲通。豈有符能禁。潛行地肺中。○
山靈煩構思。若或運風斤。布置林花勝。生成鳥
獸羣。旛垂無影見。鐘叩有聲聞。觸目皆奇石。玲
瓏玉不分。○燎盡促歸頻。風光出洞新。此身今
屬我。罕事更邀人。乍覺日初落。翻疑夜向晨。游
茲如夢裏。記憶未全真。

石經山

房山縣西南四十里。有山好着白雲。腰其半麓。曰
白帶山。所生懋題草。他山實無。曰懋題山。藏石經
者。千年矣。始曰石經山。至今也。亦曰小西天。云北
齊南嶽慧思大師。慮東土藏教有毀滅時。發願刻
石藏。闕封岩壑中。以度人劫。嶽坐下靜琬法師。承
師付囑。自隋大業。迄唐貞觀。大涅槃經成。其夜山
爲三吼。爲生香樹三十餘。六月水漲。爲浮大木千

統至山下、構雲居寺焉、唐玄宗第八妹金仙公主、
修之、我洪武二十六年、又修之、正統九年、又修之、
山上雷音洞、高丈有餘、縱橫于高有倍、上幔覆、壁
四刻經、柱四刻像、前石有扉、維以開閉、几案瓶罏
皆石、石臺有欄、橫與堂亘、堂左洞二、右洞三、堂下
洞二、皆經、唐迄元、代有續刻、經目列石幢、人傳洞
之初穿、火龍也、今石壁凹凸處、猶燒痕矣、洞中燥
而北、澗池之、井之、洞北有泉、澍澍竇石、逕石下山
始潤于土、木根石而資泉、藤腹乎木、亦資泉、自古
幕泉上、徑泉之南、旋旋登、登山五頂、號之曰五臺、
金仙公主、各白石小塔、以峯之、東臺壁上、掌印四
號之曰文殊印也、別峰冠石、後廣前銳、出于虛空、
號之曰曝經臺、山下左右、東峪寺、西峪寺、西峪寺
後、香樹林、香樹生處也、夢堂菴、唐夢堂師居處也、
林後、琬公塔也、萬曆壬辰、達觀和尚、覩像設衰頹
石版殘蝕、拊幢號痛、率僧芟除、是夜爲來風雷光、

照巖壑、翌日啓洞、拜經石、石下有穴、藏石函一尺、

上刻大隋大業十二年、歲次丙子、四月丁卯朔、八

日甲子、于此函內、安置佛舍利三粒、願住持永劫。

三十六字、發跡際、異香發于函、蓋石銀金函、三發

而得小金瓶、舍利現矣、狀黍米、色紫紅、師悲戀禮

贊、聞于慈聖太后、迎入供養、函瓶以玉、外函復

之、安置故處、僧憨山撰雷音窟舍利記、刻之石、按

法苑珠林、白色骨舍利、黑色髮舍利、赤色肉舍利、

茲三粒者、其肉色也、山古碑多于林木、著者、二隋

碑、一仁壽元年、王臣曠碑、一仁壽元年、王邵碑、五

唐碑、一開元十年、梁高望碑、一開元十五年、王大

說碑、一元和四年、劉濟碑、一景雲二年、甯思道碑、

一太極元年、王利貞碑、二遼碑、一清寧四年、趙遵

仁碑、一天慶八年、沙門志才碑、二元碑、一至正元

年、賈志道碑、一至元二年、釋法稹碑、山半有菴、曰

半山菴、菴上半里、蹄跡宛于石、號之曰、果老驢跡、

或碑實之、

華亭袁廷玉石經山○疋馬西風古樹邊、那知此地有西天、山藏石刻五千卷、寺號雲居八百年、舍利含光緣未至、懋題無種世難傳、客來龍去憑誰問、野燒餘灰火洞前、

長洲姚廣孝觀石經洞○峩峩石經山、蓮峯吐金碧、秀氣鍾懋題、花雨分西域、竺墳五千卷、華言百師譯、琬公懼變滅、鐵筆寫蒼石、片片青瑤光

字字太古色、功成一代就、用藝萬人力、流傳鄙簡篇、堅固陋板刻、深田地穴藏、高聳巖洞積、初疑鬼神工、乃著造化跡、延洪勝汲塚、防虞猶孔壁、不畏野火燎、詎愁苔蘚蝕、此山旣無盡、是法寧有極、如何大業間、而此至人出、幽明爾之功、乾坤配其德、大哉弘法心、吾徒永爲則、

餘姚趙錦石經山○畿輔之名山、懋題山奇峭、澗水下逶迤、峯石上遼遶、過巘百層樓、殊未臻堂

與前望若阻嚴、折旋有窈窕、疏鑿自何人、高朗
協神教、遺經寄靈石、書楷亦臻妙、白雲長自封
清風爲除掃、我行祇皇役、朋從恣遐討、是日烟
雲開、俎列山俱好、林鳥無數鳴、嶺猿一再嘯、絢
惟藏經人、光爭日月曜、

亳州薛蕙石經山○翠巘雙林合、丹梯一徑懸、洞
門窺地底、石室與天連、文字開龍藏、金銀布梵
筵、茲山實靈異、吾欲託棲禪、

吳縣蔣山卿石經山○金筵初布地、王字舊藏經、
石室青霞護、松門白日扃、洞衝多宿霧、巖俯四
垂星、未厭探奇意、虛疑入杳冥、

會稽王思任石經山遇南公時將重興寺事○空
山寺悄深、萬木俱不語、痛馬窮斜陽、石齒何鉏
鋸、老松窺巔壑、流根坐蒼鼠、磴轉徑忽開、蜃宮
結島嶼、中有白雲封、隋僧函教處、七穴幾千年、
名書瘞虞褚、一洞響雷音、蓮華滿兩序、展玩不

忍別、既去復延佇、遠公偶相招、泉與石同煮、靜
夜來天香、梵音如律呂、言念寺、岷崩棟逸遺殘
礎、春草換春風、碑土蕩何所、廢興各以時、七尺
猶堪許、

侯官曹學詮石經山○鬼峩干地利、迢遞幾林亭
是界應居佛、空山信有靈、火龍潭內赤、慈鷲嶺
頭青、不構巖爲室、遙臨石作扃、鐘聲虛度漢、旛
影濕飄星、貝葉翻三藏、刀錐付五丁、參差封列

洞、隱見矚踈櫺、善護中宮勅、無摩歷代銘、指心
因見法、觸景但聞馨、卽此皈依切、奚須物役停
還持舍利子、普照世途冥、

慈谿馮有經雲居寺○青青岑嶂切天開、澗石縈
迴半隱苔、松下覆茅精舍出、花間紆徑遠泉來、
經思劫後存無恙、塔想生前願可哀、洞去火龍
香去樹、雲居日夕隱風雷、

石經洞○小西方境隔層臺、半嶺何年一藏開

舍利湧光文字住。香林施淨帝天來。山名白帶
知幽爽。洞作燒痕試。劫灰更上高峯最高處。風
雷竟日爲鳴哀。

嘉興譚貞默石經山詩呈王墨池先生○范陽雄
郡竺山岑。幻出雲居香樹林。南嶽勇傳隋季法。
石鐙痴續劫灰心。時石鐙菴南公續刻石經

書龍畫經風雨。孔壁周藏並古今。自是有緣依
帝寢。陰濃泉永足幽尋。

浮山釋佛光石經山○繞繞尋思老宿心。古雲今
護石函經。分泉直下東西峪。續刻詳開夷夏名。
草長憇題承佛記。洞彌香霧走山靈。琬公寂寂
餘孤塔。澗水潺惟松月聽。

上海潘煥明石經洞○擲杖拜山經。淒涼古佛心。
老苔封舊篆。稜石別新銘。法自叅三界。神應守
六丁。一函先示寂。願切後人成。

長洲汪邦柱石經山○山灣迂杖藜。山嶺各招提。

穿穴龍腥在、旋林鳥語齊、洞雲經水火、貞珉勒
唐隋、別有幽深徑、踟躕日又西、

莆田釋真靜石經山○勝蹟傳來古、碑藏冀北天
雷音名法窟、龍氣護香烟、徧禮五峰塔、經過七
洞泉、日斜雲路復、坐樹聽鳴蟬、

盱眙李言恭小西天○鳥道千盤去、深深菴夢堂
可憐虛妄界、與作久長方、赭洞龍辛苦、香林雲
宿藏、經殘僧入塔、令我思蒼茫、

亳州朱宗吉小西天登雷音寺閣○閣眺層嵐大
漠開、四垂青藹勝遊哉、捲簾五鳳雲中出、倚檻

諸陵樹抄來、下界烟鐘曠澗壑、高天霜笛曉
樓臺、故園南望三千里、秋滿關河首重回、

西峪寺○羣山西北走幽燕、客與巖阿住宿緣、
石室有經來白馬、恒河何日長青蓮、龍隨法雨
潭中出、塵引天花座上懸、一自南能留偈後、千
年空指佛燈傳、

洪州李遷小西天○秋至水泉清、幽尋在北壩、林
多雲隱寺、巖古石藏經、幢柱思年代、龍痕見影
形、客來旋塔去、斜日洞門扃。

孟津王鐸小西天○曲路雲相間、陽坡先認春、面
猶盤古日、詩是大明人、石髓丹山復、碑趺綠蘚
屯、重來頭恐白、閱世此嶙峋。

嘉興釋行志香樹菴○無尋香樹處、故碣語蹉跎、
言念石函壽、能如塵劫多、飯香時鳥下、鐘曉宿

雲過、行脚何期日、三年再此阿、

儀真釋福濶游東西二峪○一泉生二峪、鐘磬落
雲窩、掌印佛曾現、蹄痕仙偶過、堂中夢可斷、嶽
到劫如何、感慨無邊意、荒碑帶蘚摩、

徽州吳惟明雷音洞○迂迴轉山麓、得境日西天、
禮佛雲開洞、藏經石紀年、峰飛秋壑雨、月帶暮
鐘烟、捫讀荒碑竟、懷瞻意黯然、

嘉興駱駿曾小西天○峪口旋旋路欲迷、登峰纔

見此峰低、香林懋草西來意、不道西天更向西。
○鑿石空山自六朝、留將雙塔插烟霄、幽燕十
二州中土、殘碣驚看紀大遼。○獨憐宋碣此間
無、獻納誰爭督亢圖、今日法天纔尺五、金元遺
石委平蕪。○破壁曾傳上古書、經成瘞石計非
踈、祇緣地下無秦火、不向人間較魯魚。

長洲孫嗣烈石經山○洞開龍去已千年、樹老無
香生野烟、南嶽只云塵劫永、百忙不了石頭禪。

吳江釋真可題琬公塔院○原上縱橫古石僵、年
年蝕雪與饕霜、後人莫問高僧處、心在經函身
塔藏。○雲居深處長春薇、翠壁腰雲四望迷、拂
拭石幢松樹下、慈悲山鳥向人啼。○萬里峨眉
去、復來古碑無字盡蒼苔、琬公遺願身先去、淚
在青山到劫灰。

嘉興釋道耕禮琬公塔院志感○七洞琅函今未
成、一區荒土墓門平、年年異草延春色、處處殘

碑閣澗聲。風散曉鐘。村落靜。山親高漢斗星明。
住持永劫無窮願。心逐寒雲繞。帝京。

徽州吳惟明禮三藏塔。○山溪新雨漲。蹇渡濕。餓
糧處處尋香樹。荒荒多稻場。塔森苔蘚白。峯散
菊花黃金石。延塵劫。瞻依思杳茫。

順天王嘉謨石經山別墅。○疊嶂相將至。一尊飯
白靈。荒碑無俗字。古洞有遺經。澗過石生白。藤
盤葉駐青。天風吹太急。倚杖立高冥。○茅屋半

幽村。因松結小園。雲根引。叵岱水脈別清渾。速
蔭多栽柳。荒涼晏啓門。孤懷秋汗漫。日與野人
言。

紅螺嶮

山頭苦亂、目不給瞬也。正復愛其歷亂、山澗苦喧、
耳不給聒也。正復愛其怒喧、山路苦陡、趾不給錯
也。正復愛其陡絕、爾乃樵夫牧兒、釋厥苦辛、來助
游人。矻矻惘惘、蓋險思僻情、夫人而有之已。上方
山之險僻、未險僻也。東去三十里、有紅螺嶮焉。山
通體一巒、而巒諸相具、循九龍峪、度八達嶺、犯
雲霧而上上、牛羊逕、非人逕也。曰桃葉口、入五里、

數十人家、苑隨厓起、戶隨澗開、遠望雲會門、兩峰立矣、到門而墜石開裂、真若門然、荒荒落落、亦有僧烟、如是者下嶮、下嶮而上里餘、湊湊出石隘中者、龍潭水也、過此徑窮而梯、垂鐵綆挽而下上、久之、梯窮又逕、洞曰紅螺、當年有紅螺放光也、洞石作古色、下土穹然、當年有人飲此、霹靂驟至也、龍窟歟、如是者中嶮、中嶮復上半里、嶮意漸弛、僧漸拓其宇、峰蹙者漸列、面面見其巧、然勢仍仄逼、直

上視、莫及列峰之頂、右松棚菴、一松橫陰、廣輪四五丈、半覆菴、半覆空、僧聚石松根、爲松禦風也、再右百磴、觀音洞、曲而容坐、深而朗朗、如是者上嶮、出嶮、有宇翼翼、差差、花竹簇簇者、嘉遯菴、中貴山棲焉、嶮舊名幽嵐山、一曰寶金山、樵逕之、成化年始、僧宇之、嘉靖年始、游人傳之、萬曆年始、

公安袁宏道初入紅螺嶮、鑿天出古空、意匠窮刻露、贖取長吉魂、幻作鬼工賦、霜巖透斑鏗、石

骨竦清怒、歷劫至于今、彫鏤不曾住、無石不巧
 心、轉盼殊態度、一種老健中、自發嫵媚趣、陰巘
 夾琉璃、飛仄窘仙步、一死直青山、梯足於懸樹
 入紅螺嶮道中紀事○山風吹曉作新嵐、仙夢
 茫茫古石龕、欲識死生情切處、棺材峰上卓茆
 菴、山上有棺材峰○田家打棗婦盈畝、高髻垂
 肩、竿在手、此是六郎繫馬椿、郎君未審停鞭否
 ○葫蘆棚下水平鞞、古戍遺屯記宅然、馬市時

來○今○幾○載○邊○烽○堡○裏○宿○枯○禪○

京山王應翼紅螺嶮○久聞此幽閭、心眼相競雄
 旋螺奔鳥道、漸與危嶂通、仄路蜿以蜒、天際聳
 珠宮、晝行亦怵怵、登降于蒙茸、萬峰面面來、奮
 起摩蒼穹、仰首嵐翠飛、吾意默與融、○深深未
 遑息、已飫羣峰半、一門邃以宏、堅砥森几案、金
 繩鎖石梯、疊轉疑中斷、忽焉踏青紅、猿鳥亂驚
 竄、虛谷多冷風、遠樹迎人粲、倦倚賴石支、流泉

漱且盥。○峭壁神工削。蒼廣開玄竅。蹴磴蘿在手。中遂非可料。空響無定時。青蒼自相照。石貌變瞬息。日月驚其曜。人迹所罕過。乃是猿猱道。颯焉過罡風。迴度發清嘯。

聖